

0 1cm 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

deli 得力集团有限公司

浙字02260122号 No.6230

浙江圖書館

浙江圖書館



浙江圖書館



浙江圖書館

歷代臣鑒卷之三十一

惡可為戒

漢

田蚡

書 館



田蚡漢景帝王皇后母弟也。初為中大夫。有辯口。皇后賢之。武帝即位。蚡以舅封武安侯。蚡新用事。卑下賓客。進名士。欲傾諸將相。久之。罷侯家居。以皇后故親幸。數言事多效。蚡日益橫。後以肺腑得為相。入奏事。語移日。所言皆聽。薦人或起家二千石。權移主上。上通曰。且。亦吏盡未。下。請考工地益宅。

上怒曰。遂取武庫。蚡迺止。其兄蓋侯北鄉。自坐東鄉。以爲漢相尊。不可以兄故私撓。由此滋驕。治宅甲諸第。田園極膏腴。市買郡縣器物。相屬於道。前堂羅鍾鼓。立曲旃。後房婦女以百數。狗馬玩好不。可勝數。嘗使藉福請故相魏其侯竇嬰城南田。不許。蚡大怒。會蚡取宗室女爲夫人。詔列侯宗室皆往賀。時灌夫免官居長安。嬰強與夫俱往。夫與蚡素有隙。酒酣。夫行酒至蚡。蚡辭不能滿觴。夫怒。嘻笑曰。將軍貴人也。畢之行酒。次至臨汝侯灌賢。賢方與程不識耳語。夫益怒。迺罵賢。蚡亦怒。坐客乃起更衣稍稍去。

嬰戲夫出。蚡遂怒曰。此吾驕灌夫罪也。迺令騎留夫。夫不得出。藉福起爲謝。按夫項令謝。夫愈怒不肯順。蚡迺戲騎縛夫置傳舍。召長史曰。今日召宗室。有詔劾灌夫。罵坐不敬。繫居室。遣吏逐捕諸灌氏支屬。皆得棄市罪。諸灌氏皆亡匿。夫繫不得告。言蚡陰事。竇嬰竊出上書言灌夫醉飽事不足誅。上然之。賜嬰食。曰。東朝廷辨之。嬰東朝盛推夫善。丞相以它事誣罪之。蚡盛毀夫所爲不道。嬰度無可柰何。因言蚡短。蚡曰。蚡得爲肺腑。所好音樂狗馬田宅倡優。不如魏其灌夫。日夜招聚豪傑壯士。以論議。腹誹而心諂。辟睨

兩宮間。幸天下有變而各入。上問朝臣兩人孰是。汲黯等是魏其。上不聽。使御史簿責嬰。劾繫都司空。孝景時。嬰受遺詔曰。事有不便。以便宜論上。及繫灌夫罪至族。事日急。乃使昆弟子上書言之。書奏。案尚書大行無遺詔。詔書獨藏嬰家。嬰家丞封劾嬰矯先帝詔罪當棄市。迺悉論灌夫支屬。嬰良久。迺聞有劾。即欲死。又有以飛語中之者。亦論棄市。渭城既而蚡疾。一身盡痛。若有擊者。諱服謝罪。上使視鬼者瞻之。曰。魏其侯與灌夫共守筭。欲殺之。竟死。

寗成

寧成南陽穰人。以郎謁者事景帝。好氣。爲小吏必陵其長吏。爲人上操下急。如束濕。猾賊任威。遷濟南都尉。其治如狼牧羊。爲關都尉。出入關者號曰。寧見乳虎。無直寧成之怒。其暴如此。後坐法髡鉗。迺解脫。詐刻傳出關歸家。後義縱爲南陽太守。及至關。成側行送迎。然縱氣盛。弗爲禮。至郡。遂按寧氏。破碎其家。

周陽由

周陽由。景帝時爲郡守。武帝即位。吏治尚脩謹。由最爲酷暴驕恣。所愛者撓法活之。所憎者曲法滅之。爲守視都尉如令。爲都尉陵太守奪之治。後爲河東都

尉與其守勝屠公爭權相告言。勝屠公自殺。由棄市。

張湯

張湯。杜陵人。武帝時。以善治獄。補侍御史。遷太中大夫。與趙禹定律令。務在深文。及為廷尉。舞知以御人。所治。即上意所欲罪。予監吏深刻者。而深刻吏多為爪牙。其治獄。巧排大臣。自以為功。遷御史大夫。會漢伐匈奴。山東水旱。縣官空虛。湯承上指。排富商大賈。出告繆令。舞文巧詆。百姓不安。其生騷動。縣官所興。未獲其利。姦吏並侵漁。於是痛繩以罪。自公卿至于庶人。咸指湯。李文為御史中丞。於是有傷湯者。不能

爲地。湯怨之。湯所愛史魯謁居。知湯意。使人告文。湯論殺之。謁居弟發其事。下減宣窮竟。未奏。會丞相長史朱買臣等捕案湯左田信等曰。湯且欲爲請奏。信輒先知之。居物致富。與湯分之。及他姦事。事辭頗聞。帝問湯。湯不謝。又陽驚曰。固宜有。減宣亦奏謁居事。帝以湯懷詐面欺。使使八輩簿責湯。湯遂自殺。

王溫舒

王溫舒。陽陵人。少時椎埋爲姦。已而試爲亭長。累遷爲河內太守。部吏捕郡中豪猾。相連坐千餘家。大者至族。小者乃死。論報至。血流十餘里。其頗不得失之。

旁郡追求。會春。溫舒頓足曰。嗟乎。令冬月益展一月。足吾事矣。其好殺行威。不愛人如此。遷爲中尉。其治復放河內。善諂事有勢者。即無勢視之如奴。有勢家雖有姦如山。弗犯。爪牙吏虎而冠。數歲。其吏多以權貴富。會宛軍發。詔徵豪吏。溫舒匿其吏華成。及有人告溫舒受負騎錢他姦利事。罪至族。自殺。

江充

江充字次倩。邯鄲人也。初名齊。以女弟善歌舞嫁趙太子。久之。得罪太子。亡入關。更名充。誣害太子。請願使匈奴。還。武帝拜爲直指繡衣使者。督三輔盜賊。從

帝幸甘泉。逢太子家使行馳道中。充以屬吏遷水衡都尉。坐法免。後帝幸甘泉。疾病。充見帝年老。恐晏駕。後為太子所誅。因是為姦。奏言上疾祟在巫蠱。於是充為使者治巫蠱。充將胡巫掘地求偶人。捕蠱。及夜祠。視鬼。染汙。令有處。輒收捕。驗治。燒鐵鉗灼。強服之。民轉相誣。以巫蠱。吏輒劾。以大逆。亡道。坐死者丞相公主等數萬人。是時帝春秋高。疑左右皆為蠱。充知帝意。因言宮中有蠱氣。帝使黃門蘇文等助充。先治後宮。希幸夫人。以次及皇后。遂掘蠱於太子宫。云得桐木人尤多。太子懼。不能自明。欲往甘泉。訴上。充

持之急。太子不得已。收充。斬之。蘇文亡。歸告太子反。發兵捕太子。太子拒戰。敗自殺。後武帝知充詐。夷充三族。焚蘇文於橫橋。

公孫敬聲

公孫敬聲。漢武帝衛皇后姊之子也。父賀為太僕。從大將軍青出塞有功。拜丞相。敬聲代為太僕。父子並居公卿位。敬聲以皇后姊子。驕奢不奉法。擅用北軍錢千九百萬。發覺下獄。是時詔捕陽陵朱安世。不能得。帝求之急。賀自請逐捕安世。以贖敬聲罪。帝許之。後果得安世。安世者。京師大俠也。聞賀欲以贖子。笑。

曰。丞相禍及宗矣。遂從獄中上書告敬聲與陽石公
主私通。及使人巫祭祠詛上。且上甘泉當馳道埋偶
人。祝詛有惡言。下有司案驗。賀窮治所犯。遂父子死
獄中

上官桀

上官桀。漢昭帝上官后之祖父也。武帝時桀爲太僕。
昭帝立。與大將軍霍光同輔政。光女爲桀子安妻。生
女五歲。欲因光納之宮中。光不聽。時帝姊蓋長公主
居禁中。私近子客。丁外人。安說外人言於蓋長公主。
召入爲婕妤。遂立爲后。安以后父封桑樂侯。遷車騎。

將軍日以驕淫。受賜殿中。出對賓客言。與我婿飲。大樂。或醉則裸行。又內與後母及父諸妾亂。桀縱其惡。方爲丁外人求封侯尚公主。光不許。長公主以是怨光。桀父子亦慚恨。與蓋主等謀。詐令人上書言光罪。欲共執退光。帝獨明其無罪。知上書者詐。詔捕之。桀等懼。欲與長公主置酒請光。伏兵格殺之。事覺。詔誅桀。安外人。并族其家。長公主自殺。

霍禹

霍禹。漢宣帝霍皇后之兄。大將軍光之子也。嗣光爲博陸侯。光兄之孫雲。山。皆爲列侯。一門尊盛無比。宣

帝既立。以微時許妃爲后。光夫人顯欲貴其少女成君。會許皇后當娠病。令女醫淳于衍進毒藥弒之。乃勸光納成君。遂立爲后。光卒。帝頗聞霍氏毒殺許后事。乃損霍氏之權。更用所親信許史子弟。顯及禹、雲山。自見日損削。數相對啼泣自怨。又聞民間讜言弒后事。顯恐急。即具以實告禹、雲山。皆驚曰。此大事。罰不小。柰何。於是謀令太后爲宣帝外祖母博平君置酒。召丞相平、恩侯以下。使光婿范明友、鄧廣漢承太后制。斬之。廢帝而立禹。約定未發。會事覺。雲山、明友自殺。捕顯。禹、廣漢腰斬。諸女弟皆棄市。霍后廢處昭

臺宮

淳于長

淳于長字子孺。漢元帝王皇后姊子也。爲黃門郎。成
帝立。拜爲列校尉。諸曹。遷水衡都尉侍中。至衛尉九
卿。久之。趙飛燕貴幸。帝欲立以爲后。太后以其所出
微。難之。長往來通語。歲餘。趙皇后得立。帝甚德之。賜
爵關內侯。後封定陵侯。大見信用。貴傾公卿。外交諸
侯。牧守。賂遺賞賜。累萬。多蓄田妻妾。淫於聲色。不奉法
度。初許后廢居。長定宮。而長與后姊嬪私通。受許后
賂遺。詐許爲白。上立爲左皇后。罪坐大逆。詔窮治。遂

死獄中。妻子徙合浦。

王鳳

王鳳。漢元帝皇后之弟也。元帝崩。成帝立。鳳爲大將軍。大司馬。領尚書事。鳳子弟皆列侯卿大夫。鳳由是專權用事。上無所顧。左右常薦劉歆。通達有奇異材。上召見。欲以爲中常侍。左右皆曰。未曉大將軍。上以是語鳳。鳳以爲不可。迺止。其見憚如此。建始元年夏。雨雪。詔求直言。議者多歸咎於鳳。琅琊太守楊彤與鳳連婚。其郡有災害。丞相王商按問之。鳳怨商。陰求其短。使人告之。詔收商丞相印綬。商歐血死。日食。京

兆尹王章奏封事。言其咎皆鳳專權蔽主之過。又薦琅琊太守馮野王可爲輔相。鳳聞之。稱疾不出。上乃下王章獄。竟免野王官。自是公卿見鳳側目而視。威權益盛。群弟爭爲奢侈。姬妾各數十。僮奴以千數。大治第宅。羅鐘磬舞女。驕僭已極。鳳卒。王音代爲大司馬。迨王莽秉政。至王莽死。王氏皆滅。

息夫躬

息夫躬字子微。河陽人也。少爲博士。與長安孫寵相結。是時哀帝被疾。始即位。人有告中山孝王太后祝詛。太后及弟宜鄉侯馮參皆自殺。其罪不明。是後無

鹽危山有石自立開道。躬與寵謀曰：上無繼嗣，體久不平。今無鹽有大石自立，聞邪臣託往事以爲太山石立而宣帝龍興，遂告東平王雲與其后，祝詛欲求非望。上惡之，下有司按驗。王與后等皆坐誅，擢寵爲南陽太守，封方陽侯。躬光祿大夫，封宜陵侯。丞相王嘉內疑東平獄事，言寵躬皆傾覆，有佞邪材，恐必撓亂國家，不可任用，不聽。躬既親近，論議無所避，衆畏其口，見之反目。歷詆公卿大臣以爲不足用。外戚傳晏言董賢貴幸，與躬謀欲居位輔政，會單于當來朝，遣使言病，願朝明年。躬因是上奏欲詐爲降胡上書。

出兵擊之。左將軍公孫祿以爲中國以威信懷服夷狄。匈奴單于保塞稱藩。疾病不任朝賀。遣使自陳。不失臣子之禮。躬欲逆詐。造不信之謀。不可許。躬堅執其說。又言天象有非常之變。可遣大將軍行邊兵。救武備。上乃拜孔鄉侯傅晏爲大司馬衛將軍。陽安侯丁明又爲大司馬驃騎將軍。是日日有食之。丞相御史奏躬罪過。上由是惡躬等。虛造詐謾之策。以誑誤朝廷。交游貴戚趨權門。罷其官。遣就國。人有告躬怨恨祝詛。下獄死。躬母聖亦以祝詛大逆不道。棄市。家屬徙合浦。

王莽

王莽字巨君。漢元帝皇后之弟子也。永始中封莽新都侯。莽散財賑施賓客。交結將相。嘗私買侍婢。昆弟怪之。莽曰。後將軍朱子元無子。此婢宜子。故買之。遂以婢奉子元。後代王根爲太司馬。母病。公卿列侯夫人問疾。莽妻迎之。衣不曳地。布裙蔽膝。其譎詐飾名類此。哀帝即位。政由莽出。平帝立。年九歲。太后委政於莽。莽色厲而言方。附順己者。拔擢。忤恨者。誅滅。大肆威福。又諷塞外蠻夷獻白雉。太后詔以薦宗廟。羣臣皆陳莽功德比周公。遂賜號安漢公。莽又納其女。

為皇后以固威權。遂加莽號曰宰衡。位在諸侯王上。莽媚事太后左右。由是皆譽莽。莽又白令太后車駕巡遊四郊為娛樂。無非欲得意於太后也。帝年漸長。莽恐削奪其權。因臘日上椒酒。置毒酒中。帝飲酒疾作。莽作策請命于泰時。願以身代。藏策金縢。置于前殿。帝崩無嗣。莽特選宣帝玄孫最幼者劉嬰。假以卜相得吉。立嬰為孺子。迫太后取傳國璽。自為攝皇帝三年。遂篡位。於是東郡太守翟義等起兵誅莽。而光武皇帝興復漢室。莽就誅。分裂其身。子孫滅亡。

歷代臣鑒卷之三十

歷代臣鑒卷之三十一

惡可為戒

漢

彭寵

彭寵字伯通。南陽宛人也。光武時。為漁陽太守。帝討王郎。寵發突騎。轉輸糧食。前後不絕。及帝追銅馬至薊。寵自負其功。意望甚高。帝接之不能滿其意。愈怏怏。帝即位。寵未受封。輒歎曰。我功當為王。尔者陛下忘我耶。漁陽舊有鹽鐵官。寵轉以質穀積珍寶。益富強。會帝徵寵。寵自疑不受徵。其妻素剛。亦固勸無受。

名。寵遂發兵反。拜署將帥。攻陷城邑。自立為王。後為其奴所縛。并其妻殺之。函首詣關。夷其宗族。

竇憲

竇憲字伯度。漢章帝竇皇后兄也。后既立。拜憲為郎。遷虎賁中郎將。弟薦黃門侍郎。兄弟並見親幸。憲恃寵奪沁水公主園田。主畏逼不敢計。後發覺。帝怒。召憲切責曰。深思前過。奪主園田時。何用愈趙高指鹿為馬。久念使人驚怖。貴主尚見枉奪。何況小人哉。國家棄憲如孤。雖腐鼠耳。憲大振懼。皇后為毀服深謝。使以田還主。和帝即位。尊皇后為太后。憲以侍中內

幹機密。弟薦為虎賁中郎將。景瓌並中常侍。皆在親
要之地。而憲性果急。睚眦之怨。莫不報復。齊殤王子
都鄉侯暢來吊國憂。暢與步兵校尉鄧疊親。因疊母
元自通長樂宮。憲懼見幸。分其權。遣客刺殺暢。太后
怒。閉憲於內宮。憲懼。誅。自求擊匈奴以贖死。會南單
于請兵北伐。乃拜憲車騎將軍。發兵與北單于戰於
稽落山。大破之。遂登燕然山刻石勒功。班師而還。拜
憲大將軍。封武陽侯。憲以耿夔任尚等為爪牙。鄧疊
郭璜為心腹。班固傅毅皆置幕府。刺史守令多出其
門。尚書僕射郅壽樂恢並以忤意相繼自殺。由是朝

臣震懾望風承旨。而弟薦進位特進。景為執金吾。瓌
光祿勳。皆驕縱。而景為尤甚。縱家奴侵陵小人。強奪
財貨。太后聞之。免景官。而憲自負重勞。陵肆滋甚。疊
與弟步兵校尉磊及母元憲壻郭舉相交結。並出入
禁中。遂共圖為篡逆。帝陰知其謀。乃與中常侍鄭衆
定議誅之。會憲及疊班師還京。帝乃幸北宮。詔執金
吾收捕疊。磊。瓌。舉。皆下獄誅。家屬徙合浦。遣謁者收
憲大將軍印綬。與弟薦。景。瓌。皆遣就國。帝以太后故。
不欲名誅憲。選嚴能相督察之。憲薦。景。瓌。到國。皆逼
令自殺。宗族為官者皆免。

梁冀

梁冀字伯車。漢順桓二帝皇后之兄也。順帝拜為大將軍。暴恣多非法。沖帝立。太后臨朝。冀益侈暴。質帝即位。知冀驕橫。嘗朝羣臣。目曰此跋扈將軍也。冀聞深惡之。令左右進鳩加煮餅。帝即日崩。桓帝立。冀尤不法。害李固杜喬等。居位貪淫。遣私客籍屬縣富人錢少者至死。扶風人士孫奮富而吝。冀以馬乘遺之。從貸錢五千萬。奮與二千萬。冀怒。乃告郡縣認奮毋為其守臧婢。云盜白珠十斛。紫金千斤以叛。遂收考奮兄弟。死於獄中。凡四方歲時貢獻。皆先輸於冀。吏

人賈貨求官請罪者。道路相望。冀又遣客出塞。交通外國。廣求異物。又大起第舍。築土山。廣開園囿。其妻孫壽色美而妖妬。亦對街為宅。殫極土木。互相誇競。冀壽共乘輦車。張羽蓋。飾以金銀。游觀第內。多從娼妓。鳴鐘管。酣謳竟路。連繼日夜。又起別第於城西。以納姦亡。取良人為奴婢。至數千人。名曰自賣人。帝以冀有援立之功。特加殊禮。冀凶恣日甚。遼東太守侯猛等拜官不謁。冀即斬之。是時冀一門前後七封侯。三皇后。六貴人。二大將軍。夫人女食邑稱君者七人。尚公主者三人。卿將尹校五十七人。威行內外。百僚

側目。帝既不平。會太史令陳授因小黃門徐璜陳灾
異日食之變。咎在大將軍。冀聞之。收拷授死於獄。帝
由此怒冀。初掖庭人鄧香妻宣生女猛。香卒。宣更適
梁紀。梁紀者。冀妻壽之舅也。壽引進猛入掖庭。見幸
為貴人。冀認猛為己女。以自固。乃易猛姓為梁。時猛
姊壻邴尊為議郎。冀恐尊沮敗宣意。乃刺殺尊。又欲
殺宣。宣覺之。馳入以白帝。帝大怒。遂與中常侍單超
具瑗。唐衡。左官徐璜等五人謀誅冀。使瑗將兵千餘
人。與司隸校尉張彪共圍冀第。收冀大將軍印綬。冀
及妻皆自殺。悉收諸梁及孫氏宗親。無少長皆棄市。

董卓

董卓字仲穎。臨洮人。漢靈帝時為司空。以帝弟陳留王協賢。且自以與董太后同族。而王為后所養。欲立之。遂脅太后廢少帝為弘農王。立陳留王為帝。遷太后永安宮。酖殺之。復殺弘農王。遷都長安。燒洛陽宮室。縱放兵士剽虜資物。淫畧婦女。又發諸帝陵。收其珍寶。自為太師。子弟皆典兵事。宗族內外並列朝廷。侍妾懷抱中子皆封侯。弄以金紫。車服僭擬乘輿。召呼三臺尚書以下詣府啓事。築塢於郿。高厚皆七丈。號曰萬歲塢。積穀為三十年儲。自云事成。雄據天下。

不成守此以老。專恣殺戮。人不聊生。司徒王允等密謀誅卓。中郎將呂布便弓馬。卓信愛之。嘗小失卓意。卓拔手戟擲布。王允素善布。因以所謀告之。使為內應。因卓入朝。布持矛刺卓。趣兵斬之。并殺其母妻男女。盡滅其族。暴卓尸於市。卓素充肥。守尸吏為大炷。置臍中燃之。光明達曙。如是者積日。

曹操

曹操字孟德。沛國譙人也。機警。有權數。而任俠放蕩。漢獻帝時為騎都尉。討黃巾賊有功。時董卓劫獻帝西遷長安。操為刺史。擊破呂布。迎獻帝還洛陽。操進

錄尚書事。遷帝都許。自為大將軍。封武平侯。於是引
用其所親信於朝。挾天子以擅征伐。下令自稱功德。
尋為丞相。贊拜不名。入朝不趨。劔履上殿。自立為魏
公。加九錫。納其三女為貴人。進位諸侯王。上宮禁侍
衛。莫非曹氏之人。議郎趙彥嘗為帝陳言時策。操惡
而殺之。一日操以事入見。帝不任其懼。因曰。君若能
相輔則厚。不尔。幸垂恩相捨。操失色。俛仰求出。自是
不朝。時董承女為貴人。操殺承。求貴人并殺之。帝以
貴人有佞。請之不得。伏皇后亦懼。與其父完書言操
殘逼之狀。操聞之。使其黨郗慮華歆勒兵入宮。收后

璽綬。后逃匿壁中。歆發壁牽后出。帝時在外殿。后被髮徒跣行泣過。訣曰不能相活耶。帝曰我亦不知命在何時。遂弒后及皇子二人。兄弟宗室百餘人而立其女為皇后。自進爵為王。殺尚書崔琰為天子車服。出入警蹕。號其夫人曰后。子丕為王太子。及操卒。丕為王。遂移漢祚。及司馬氏篡位。曹氏子孫皆被殺。

袁術

袁術字公路。汝南人。漢獻帝時為後將軍。董卓之亂。術出奔。遂據南陽。日以鈔掠為資。奢侈無厭。百姓患之。時海內兵興。羣雄割據。術以名應。識文。當代漢為

帝。遂有僭逆之謀。聞孫堅得傳國璽。乃拘堅妻而奪之。議稱尊號。主簿閻象等諫不聽。遂僭稱帝。置百官。祀天地。淫侈驕奢。財用空竭。遂大窮困。士卒散走。術欲奔青州。為劉備邀之。走還壽春。因憤慨歐血死。

三國

魏延

魏延字文長。義陽人也。蜀諸葛亮伐魏。延為前部司馬。每戰嘗謂亮怯。恨已才用之不盡。延雖勇而性矜高。當時皆避下之。後亮出北谷口。病篤。密與長史楊儀等謀。歿則退軍。令延斷後。亮既卒。延不遵命。大怒。

曰。我豈為楊儀作斷後將耶。率所部徑歸。燒絕閣道。先據南谷口。逆擊儀。儀表其反叛。士卒聞之。皆散走。延奔漢中。追斬之。夷其族。

司馬懿

司馬懿字仲達。河內溫縣人也。魏武帝辟為文學掾。文帝時為丞相長史。明帝即位。封舞陽侯。督諸軍征吳。加太尉。平公孫文懿。還齊王芳即位。遷懿侍中。時曹爽何晏等驕奢無度。車服擬於乘輿。懿發其事。爽既誅。加懿九錫。朝會不拜。魏主芳久疾。不任朝。太尉王凌欲背懿。謀立楚王彪。懿聞之。率兵誅凌。并殺楚

王彪於是悉錄魏諸王置于鄴。命有司察之。不令與人交通。懿威震朝廷。既而寢疾。夢王凌為祟。遂卒。懿忌刻多權變。魏武帝嘗夢三馬共食一槽。甚惡之。謂曹丕曰。司馬懿非人臣也。汝謹備之。子師。懿卒後自為大將軍秉政。謀殺朝臣。廢張后。并魏主芳。迎立高貴鄉公髦。於是揚州都督毋丘儉。刺史文欽。起兵討之。師驚駭。病數日而卒。師之子昭為大將軍。加大都督。專擅朝政。慢上罔下。髦見威權日去。不勝其忿。謂侍中王沈。尚書王經曰。司馬昭之心。路人所知也。吾不能少受廢辱。當與卿等討之。經曰。權在其門久矣。

朝廷四方爭為之致死。陛下一旦如此。無乃欲除疾而更深耶。髦入白太后。王沈等走告昭。髦遂拔劍升車。率宿衛兵鼓譟而出。護軍賈充與髦戰南關下。不勝。見舍人成濟。曰。司馬公畜養汝等。正為今日之用。濟即抽刀刺殺髦。昭由是益專權。自為晉王。遂移魏鼎矣。

鍾會

鍾會。魏元帝時。為司徒都督關中諸軍事。有異志。憚鄧艾未敢發。因艾伐蜀。會遂誣其反狀。而自進軍成都。以徵艾。送艾京師。會遂決意謀反。曰。事成可得天

下。不成退保蜀漢。不失作劉備也。會郭太后卒。會乃
悉召諸將為太后發哀。稱遺詔起兵。以討司馬昭為
名。兵未發。為胡烈。胡淵所殺。

孫綝

孫綝。吳之宗室。丞相峻之弟也。峻為大將軍。驕矜險
害。多所刑殺。百姓囂然。因征魏。發病卒。綝為侍中。輔
政。負責倨傲。多行無禮。擅殺臣宰。廢吳主亮為會稽
王。迎立琅琊王休。休既立。綝為丞相。一門五侯。皆典
禁兵。權傾人主。又以吳主禮待與羣臣等。乃出怨言。
曰。帝非我不立。今待我如此。當復改圖矣。吳主知之。

恐其有變。數加賞賜。緄求出屯武昌。衛士告其謀反。因臘會縛而斬之。以其首令衆。并發峻冢。取其印綬。斲而埋之云。

步闡

步闡。臨淮人。世為西陵督。封西亭侯。吳主皓徵為帳下督。闡以累世在西陵。忽被徵命。自以失職。遂據城降晉。晉加闡侍中。仍督西陵。吳主遣將軍吾彥討之。拔西陵。遂誅闡。步氏族滅。

晉

王敦

王敦字處仲。琅琊臨沂人。尚武帝女襄城公主。拜駙馬都尉。除太子舍人。洗馬潘滔見而目之曰。處仲蜂目已露。但豺聲未振。若不噬人。亦當為人所噬。後為左將軍都督征討諸軍事。元帝初鎮江東。威名未著。敦與從弟導同心翼戴。以滅杜弢功。進鎮東大將軍。開府儀同三司。加都督江揚交廣荆湘六州諸軍事。江州刺史。封漢安侯。敦始自選置。兼統州郡。杜弢將杜弘降。敦以為將。南康人何欽聚黨數千人。敦就加四品將軍。專擅之迹漸彰矣。初敦務自矯厲。雅尚清淡。口不言財色。既有重名。又立大功。專任閫外。手握

強兵。羣從貴顯。威權莫二。遂欲專制朝廷。有問鼎之
心。帝畏而惡之。遂引劉隗。刁協。以為心膂。敦不能平。
嫌隙始構。及湘州刺史甘卓。遷梁州。敦欲以從事中
郎陳須代卓。帝不從。更以譙王承鎮湘州。敦復表陳
古今忠臣見疑。小人交構。欲以感動天子。帝愈忌憚
之。加敦羽葆鼓吹。增置官屬。帝以劉隗為鎮北將軍。
戴若思為征西將軍。悉發揚州奴為兵。外以討胡。實
禦敦也。永昌元年。敦率眾內向。以誅劉隗為名。吳興
沈充起兵應敦。敦至蕪湖。又上表罪狀刁協。帝大怒。
下詔曰。王敦憑恃寵靈。放肆狂逆。方朕太甲。欲見幽

囚。是可忍也。孰不可忍。今親率六軍以誅大逆。有殺
敦者封五千戶侯。敦兄含時為光祿勳。叛奔于敦。敦
至石頭。王師敗績。敦擁兵不朝。大肆劫掠。收周顛戴
若思害之。乃以敦為丞相。江州牧。進爵武昌郡公。邑
萬戶。使太常荀崧就拜。又加羽葆鼓吹。並偽讓不受。
還屯武昌。多害忠良。寵樹親戚。以兄含為衛將軍。都
督沔南軍事。領南蠻校尉。荊州刺史。敦又自督寧益
二州。及帝崩。諷朝廷徵已。加黃鉞。班劍。武賁二十人。
奏事不名。入朝不趨。劔履上殿。敦移鎮姑孰。帝使侍
中阮孚勞以牛酒。敦稱疾不見。使主簿受詔。又自為

揚州牧敦既得志。暴慢愈甚。四方貢獻多入其府。將相岳牧悉出其門。以沈充錢鳳為謀主。諸葛瑤鄧岳為爪牙。並凶險驕恣。殺戮自己。大起營府。侵人田宅。發掘古墓。剽掠市道。士庶解體。敦無子。養含子應。及敦病甚。拜應武衛將軍。以自副。敦病轉篤。使錢鳳鄧岳等率眾向京師。王含為元帥。又上疏罪狀溫嶠。以誅奸臣為名。含至江寧。帝遣中軍司馬曹渾擊含。含敗。敦聞。怒曰。我兄老婢耳。門戶衰。世事去矣。因作勢而起。困乏復卧。謂羊鑒及子應曰。我亡後。應便即位。先立朝廷百官。然後營葬。俄而敦死。應裹尸以席埋。

於廳事。縱酒淫樂。蘇峻等又擊敗王含。周光等斬沈
充。錢鳳傳首京師。發瘞出王敦尸。跪而戮之。皆梟首
南桁。觀者稱慶。王含奔荊州。刺史王舒。舒使人沉之
於江。餘黨悉平。

蘇峻

蘇峻字子高。長廣掖人也。永嘉之亂。百姓流亡。峻糾
合數千家。結壘于本縣。是時豪傑所在屯聚。以峻最
強。遂推為主。曹蕤領青州刺史。表峻為掖令。不受。蕤
恐其為患。將討之。峻懼。率數百家南至廣陵。朝廷嘉
之。以為鷹揚將軍。助討周堅於彭城。有功。除淮陵內

史遷蘭陵相。初王敦作逆。徵峻討敦。不至。敦再犯順。召峻入援。峻大破敦軍。進冠軍將軍。歷隲內史。加散騎常侍。封邵陵公。峻本單微。至是威望漸著。頗懷驕溢。潛有異志。撫納亡命。稍不如意。便肆忿言。成帝即位。庾亮輔政。徵峻為大司農。以其弟逸代領部曲。峻疑亮害已。遂反。以討亮為名。率衆濟自橫江。次陵口。王師敗績。峻遂據蔣陵。覆舟山。因風縱火。臺省官署。一時蕩盡。遂陷宮城。縱兵大掠。窮凶極暴。驅役百官。裸剥男女。矯詔大赦。惟庾亮兄弟不在原例。自為驃騎領軍。將軍。錄尚書事。改易官司。樹立私黨。遣兵四

出攻陷城邑。所過殘滅。百姓苦之。温嶠陶侃唱義討賊。峻遂遷天子於石頭。逼迫居人聚於後苑。嶠等築壘於白石。峻幾陷之。凶威日盛。嶠與趙胤率兵從白石南上。欲臨之。峻遣子碩與匡孝以數十騎先薄。趙胤敗之。峻望見胤走。曰。孝能破賊。我更不如乎。因舍其衆。與數騎突陣。不得入。迴趨白木陂。牙門彭世等投以戈。墜馬。斬首鬻割之。焚其骨。其黨韓晃等相繼皆就誅。

温

桓温字元子。譙國龍亢人。宣城太守彝之子也。素豪

爽有風槩。沛國劉炎稱之曰。溫眼如紫石稜。鬚如蝟
毛磔。孫仲謀晉宣王之流亞也。選尚南康長公主。拜
駙馬都尉。累遷徐州刺史。庾翼薦之。以溫為都督荆
梁四州諸軍事。安西將軍。荊州刺史。溫既滅蜀。進位
征西大將軍。開府封臨賀郡公。朝廷用殷浩欲以抗
溫。溫甚忿。欲觀釁。雖有君臣之迹。但羈縻而已。八州
士衆資調不為國家用。聲言北伐。拜表即行。人情震
駭。既而中止。時殷浩至洛陽。修復園陵。然屢戰屢敗。
溫復進督司州。乃奏廢浩。自此內外大權一歸於溫。
溫遂北伐。符健至灞上而還。進溫征討大都督。督司

冀二州諸軍事。委以專征之任。進至伊水。敗姚襄。修
謁諸陵。遂旋軍。請移都洛陽。朝廷未許。加溫侍中大
司馬。都督中外諸軍事。假黃鉞。尋加羽葆鼓吹。復率
軍至合肥。加揚州牧。錄尚書事。使侍中顏旄宣旨。召
溫入參朝政。辭不就職。遂移鎮姑孰。自以雄武窺覲
非望。嘗撫枕嘆曰。既不能流芳後世。亦當遺臭萬年。
太和四年。又悉衆北伐。敗績。溫甚恥之。歸罪素真。表
廢為庶人。溫行役既久。又兼疾癘。死者大半。百姓嗟
怨。溫負其才力。久懷異志。欲先立功河朔。還受九錫。
既逢覆敗。名實頓減。於是廢帝而立簡文。威勢翕赫。

簡文帝崩。遺詔溫秉政。如諸葛武侯王丞相故事。溫初望其禪位。不尔便為周公居攝。既不副所望。憤然入朝。內外懷懼。於是拜高平陵。左右覺其有異。拜時頻言。臣不敢。既而謂從者曰。先帝向遂靈見。又見其所殺殷洎在帝側。因而遇疾。歸鎮卒。

桓玄

桓玄。溫之子也。襲溫爵為南郡公。中書令。王國寶用事。謀削弱藩鎮。玄結荊州刺史殷仲堪。欲起兵。會國寶死而罷。乃求為廣州。會稽王道子等憚玄。不欲使在荆楚。以玄督交廣二州。玄受命不行。仲堪等推玄

為盟主。詔加玄都督荊州四郡。玄潛有并吞之意。害殷仲堪。楊佺期。遂平荊雍。表求領江荆二州。詔以玄都督荆司雍秦梁益寧七州。後將軍荊州刺史假節。以桓脩為江州刺史。玄固爭江州。又輒以兄偉為冠軍將軍。雍州刺史。時寇賊未寧。朝廷重違其意。從之。玄於是樹用腹心。兵馬日盛。調益鎮戍。招集流人。自謂三分有二。知勢運所歸。屢上禎祥。以為己瑞。孫恩逼京都。玄外託勤王。實欲觀釁。以庾楷為右將軍。楷以玄與朝廷構怨。恐禍及已。密結後將軍元顯。許為內應。元顯稱詔伐玄。玄興兵犯順。入京師。矯詔加已總

百揆。侍中都督中外諸軍事。丞相錄尚書事。揚州牧領徐州刺史。又加假黃鉞羽葆鼓吹。增置官屬。害元顯于市。其黨皆居大官。不臣之迹已著。自知怨滿天下。欲速定篡逆。於是改授羣司。自為楚王。加九錫。逼帝禪位。驕奢荒侈。遊獵無度。以夜繼晝。徵呼嚴速。百姓疲苦。朝野勞瘁。於是劉裕等起兵興復。玄竄歸武昌。累戰皆敗。欲謀入蜀。益州督護馮遷斬之。裕等分逐盡收。斬其親屬黨與。桓氏遂滅。

浙江圖書館

目錄卷之三十一

十三

歷代臣鑑卷之三十二

惡可為戒

南北朝

沈攸之

沈攸之字仲達。吳興武康人。宋明帝時。累遷郢州刺史。為政刻暴。士大夫有忤意者。輒鞭撻之。賦斂嚴苦。徵發無度。繕脩船艦。營造器甲。潛有異圖。廢帝即位。遷鎮西將軍。荊州刺史。聚斂兵力。養馬二千匹。倉廩充實。於是益懷不臣之心。朝廷制度無所遵奉。富貴擬於王者。夜中諸廂然燭。達旦。後房服珠玉者數百。

人自擅閫外。詔徵之不受命。直閣高道慶自江陵還。言其反狀。廢帝密遣刺客圖之。未果。而攸之舉兵。其妾崔氏泣諫曰。官年老。那不為百口作計。攸之不聽。率其衆發江陵。攻郢州。為州將柳世隆所破。還向江陵。為刺史張敬兒所據。無所歸。乃與其子文叔奔華容之鱣頭林。村人欲取之。攸之窮蹙。與文叔自經死。村人斬其首送關下。

范曄

范曄字蔚宗。順陽人。仕宋為尚書吏部郎。彭城大妃薨。將葬。祖夕。曄與其弟司徒祭酒廣等並集東府。乃

夜中酣歌。開北牖聽挽歌為樂。彭城王義康怒。左遷
曄宣城太守。不得志。乃撰後漢書。至於屈伸榮辱之
際。未嘗不致意焉。兄暠為宜都太守。嫡母隨暠在官
止。報至。曄不時奔赴。及行。又携伎妾自隨。為御史所
劾。久之。遷太子詹事。有孔熙先者。為負外散騎侍郎。
久不得調。而熙先之父為廣州刺史。以贓貨得罪。義
康救免之。及義康有過。被黜。熙先密懷報義康。以曄
志意不滿。欲引之。乃厚結曄甥謝綜。求見曄。熙先家
富於財。而善博戲。每與曄戲。故為不敵。輸物甚多。曄
利其財。遂與申莫逆之好。熙先以微意動曄。曄陽不答。

而其意乃定。時曄與沈演之並為文帝所知。每被召多同。曄先至必待之。而演之先至常獨被引入。曄以此為怨。而綜又申義康之意於曄。於是曄逆謀愈深矣。熙先素善天文。乃言江州應出天子。義康可當之。於是與曄謀與宿衛隊主許耀相結。使為內應。會南平王出鎮。帝於虎帳岡祖道。其日曄等皆從。耀侍帝側。扣刀以目曄。曄不敢視。俄而坐散。不得發。徐湛之表言其反狀。詔收綜。曄熙先等付廷尉獄。皆伏罪。及將詣市。曄家人悉至。其妻罵曄曰。君不感天子恩。身死固不足塞罪。柰何枉殺妻子。曄所生母泣罵曰。主

上念汝無極。不能感恩。又不念我老。乃以手擊擘頭。擘悲泣而已。與熙先綜及黨與皆伏誅。免義康為庶人。

侯景

侯景字萬景。魏之懷朔鎮人。初事爾朱榮為定州刺史。與魏相高歡相友。及歡誅爾朱氏。景以衆降於歡。曰。恨不得請兵三萬。橫行天下。濟江縛取蕭衍老公。以作太平寺主。歡乃使擁兵制河南。景右足短。弓馬非其長。然詭詐有智術。及歡疾。薦上表降梁。武帝封景河南王。督河南北諸軍事。為慕容紹宗所敗。與數

騎濟淮。見者罵之曰。跛脚奴何為耶。奔還壽陽。自求
貶削。詔優容之。復求資給。又請娶於王謝。帝不許。景
恚曰。會將吳兒女以配奴。於是遂懷反計。召募居人
為軍。啓求錦萬匹為軍人袍。又以臺所給仗多不能
精。請更營造給之。多所徵求。表疏言辭不遜。司州刺
史羊鴉仁言景有異志。朱异並抑不奏。故景姦謀益
果。遂發兵以誅朱异等為辭。請帶甲入朝。武帝聞之。
勅斬景者賞封二千戶。無一州刺史。命鄱陽王休範
等討之。景進攻歷陽。自采石進至朱雀舫。以兵攻城。
築長圍以絕內外。縱兵殺掠。交屍塞路。富室豪家子

女妻妾悉入軍營。乃益造諸攻具。及飛樓撞車。攻城久不能拔。而邵陵王世子子堅。帳下士熊曇朗等。潛開城西北樓。納賊。賊衆悉上。景以甲士五百自衛。帶劍升殿。帝使向榻坐。謂曰。卿在戎日久。無乃為勞。景默然。又問卿何州人。來至此。又不對。又問初度江有幾人。景曰。千人。圍臺城有幾人。曰。十萬。景出謂其黨曰。吾常據鞍對敵。意了無怖。今見蕭公。使人自懼。豈非天威難犯。吾不可以再見也。出屯西州。令其黨鹵掠乘輿服玩。後宮嬪妾。收王侯朝士。矯詔自為大都督。帝憂憤感疾崩。簡文即位。景矯詔自加班劍四十

人。給前後部羽葆鼓吹。置左右長史。景虐於用刑。酷忍無道。於石頭立大舂碓。犯法擣殺之。又禁人偶語。不許大酺。有犯則刑及外族。尋矯詔自進位相國。封漢王。遣宗子仙鬻陷郢州。乘勝西上。次巴陵。為胡僧祐等所破。夜遁還都。乃廢簡文。迎豫章王棟即位。尋矯詔禪位。大赦改元。王僧辯軍至蕪淩。擊破景水軍。進營石頭。與景戰。大破之。景敗。以皮囊盛二子。挂馬鞍。與百餘騎東奔。侯瑱等追之。其衆舉幡乞降。景與數十人單舸走。推墮二子於水。自漉瀆入海。至胡豆洲。太子舍人羊鯤走入船。以稍刺殺之。送于王僧辯。

僧辯截其二手送齊文宣而傳屍江陵復以鹽五斗置腹中送建康暴於市百姓爭屠膾之其家屬奔魏高澄命先剥景妻面皮以大鐵鑊盛油煎殺之女入宮為婢男三歲者下蠶室後齊文宣又悉取景子煮於鑊其子之在北者無遺類焉。

王偉

王偉其先洛陽人後居潁川仕魏為行臺郎侯景叛偉與協謀其文檄並偉所製及行篡逆皆偉創謀也景敗偉走匿草中直瀆戍主黃公喜禽送王僧辯僧辯曰卿為賊相賊敗不能死尚求活草間何為命之

出。左丞虞隲遇之而唾其面。曰。死虜庸復能為惡乎。與呂季略周石珍等俱送江陵獄。元帝使釘釘其舌於柱而剗其腸。仇家鬻其肉至骨。方刑之。並夷三族。

司馬申

司馬申字季和。河內溫人也。仕陳為太子左衛率。兼中書通事舍人。遷右衛將軍。擅作威福。性忍害。好飛書以譖毀朝之端士。罹其殃者甚多。參預謀謨。乃於外宣說以為己力。省中秘事往往泄漏。性又果敢。善應對。能候人主顏色。有忤己者必微言譖之。附己者因機進之。是以朝廷內外皆從風靡。時右僕射沈君理

卒。朝議以毛喜代之。申慮喜預政。乃短喜於後主。喜由是廢錮。又與施文慶等譖殺傅縡。是以文武解體。國家至於覆滅。申嘗晝寢尚書省。有群鳥下啄其口。血流及地。時論以為譖賢之報也。尋卒。

沈客卿

沈客卿。吳興武康人。與施文慶俱仕陳。最相親昵。文慶為中書舍人。引客卿為用。然俱不達大體。督責苛碎。後主信任之。累遷尚書儀曹郎。舊制軍人士人二品。清官並無關市之稅。時後主盛脩宮室。窮極耳目。府庫空虛。興造之費。恒苦不給。客卿唯以刻削百姓。

為事。乃奏不問士庶並責其稅。又以陽惠朗等為大市令。考校簿領。糾謫嚴急。百姓怨嗟。於是歲入過於常數十倍。後主大悅。加客卿散騎常侍。及隋師至。臺城失守。隋晉王廣以客卿重賦厚斂以悅主。執文慶惠朗等於石關前斬之以謝百姓。

孔範

孔範字法言。會稽山陰人。後主即位。為都官尚書。甚見親愛。後主性愚狠惡。聞過失。每有惡事。範必曲為文飾。稱贊其美。時孔貴人絕愛幸。範與孔氏結為兄妹。寵遇優渥。言聽計從。朝廷公卿莫不畏憚。範益驕。

矜以爲文武才能舉朝莫及嘗白後主曰諸將皆起自行伍無深見遠慮自是將帥微有過失後主即奪其兵及隋師濟江諸將請爲備又頻請兵出戰範沮之見事急乃請自戰立功未陣而遁城陷與後主及散騎王暕王儀御史沈瓘俱入長安隋文帝暴其過惡名爲四罪人流竄遠裔以謝吳越之人暕儀並琅琊人刻薄貪鄙忌害才能儀又能候意承顏嘗獻其二女以求親昵瓘慘毒苛酷發言狂邪故同罪焉。

爾朱榮

爾朱榮字天寶北秀容人也世爲部落酋帥官游擊

將軍。魏正光中。以討賊功。封博陵郡公。率衆至肆州。刺史尉慶賓閉城不納。榮怒。攻拔之。署其叔羽生為刺史。執慶賓。還秀容。兵威漸盛。朝廷不能制。明帝暴崩。少主立。榮與元天穆等密議入匡朝廷。立莊帝。榮為使持節都督中外諸軍事。大將軍。開府尚書。令領軍。將軍太原王。惑武衛將軍費穆之言。謂天下乘機可取。乃譎朝士向河陰為盟。以騎圍之。殺王公卿士二千餘人。沈靈太后及少主于河。使御史趙元則作禪文圖禪位。倡言元氏既滅。爾朱氏興。軍士咸稱萬歲。使以金鑄已像。不成。又卜之不吉。榮亦精神恍惚。

不能自持。事乃寢。又欲移都不果。始奉莊帝向洛陽宮。麾下之人皆乘馬入殿。榮女先為明帝嬪。至是欲立為后。使左右諷帝從之。榮甚悅。還晉陽。令元天穆留京為侍中。太尉錄尚書事。京畿大都督兼領軍將軍。封上黨王。樹置腹心。布在列位。舉動皆由其意。及榮破葛榮元顥。累加大丞相。天柱大將軍。增封通前二十萬戶。加前後羽葆鼓吹。榮雖在晉陽。而遙制朝廷。莊帝雖受制。而勤於政事。榮嘗啓用北人為河內諸州。欲為掎角勢。帝不即從。天穆入見曰。天柱既有大功。為國宰相。若請普代天下官屬。恐陛下亦不得

違。帝正色曰。天柱若不為人臣。朕亦須代。其猶存臣節。無代天下百官理。榮聞大怒。而皇后又妬恨無禮。榮之黨屬皆陵侮帝左右。無所忌憚。榮諷求九錫。帝不欲與。而有意圖之。會榮來京師。中外洶洶。帝懲河陰事。乃與城陽王徽等定謀。然榮輕帝無能為。與天穆俱入朝。欲大有革易。並御床南坐。榮見光祿卿魯安等持刀從東戶入。即馳向御坐。帝拔千牛刀手斬之。天穆與榮子菩提亦就戮。內外喜叫。聲滿京城。榮從子兆復稱兵犯關。以莊帝歸晉陽弒之。高歡舉兵擊兆。兆敗竄窮山自縊死。其從弟彥伯世隆度律族。

子天光等皆窮兇極暴。而皆相繼伏誅。

馮子琮

馮子琮長樂信都人。仕齊累官至吏部尚書。其妻胡皇后姊也。子琮縱之。請謁公行。貨賄填積。守宰除授先定錢帛。然後奏聞。又廣拓旁隣。增修宅宇。以夜繼日。嬖人和士開居要當權。子琮深相附託。士開弟娶妻。子琮檢校趨走。與士開府寮無異。時內外除授多由士開奏擬。子琮既恃內戚。無帶選曹。媚其權寵。頗生間隙。時陸媪勢震天下。子琮陰欲殺陸媪及士開。因廢帝而立琅琊王。事覺伏誅。子琮微有識鑒。頗慕

存公。及位望轉隆。宿心頓改。擢引非類。縱其子弟。不依倫次。擅以官爵。榮其私親。矯縱如此。故及於禍。諸子皆除名。

隋

楊玄感

楊玄感。華陰人。楚國公素之子也。雄俊便騎射。以父軍功。位柱國。拜鴻臚卿。罷楚國公。遷禮部尚書。性雖倨傲。而愛重文學。後見朝綱漸紊。煬帝猜忌。內不自安。潛有異圖。以帝好征伐。陰求將領。以立威。帝禮遇益隆。頗預朝政。征遼之役。令玄感於黎陽督運。故遷

延不發。其弟玄縱萬石。並從帝。玄感陰遣人召之。謬稱來護兒失軍期而反。以動衆。置官屬。發兵以討。護兒為名。迎蒲山公李密為謀主。率兵向東都。從亂者如市。有衆十餘萬。時越王侗守東都。令戶部尚書樊子蓋等禦之。而武衛將軍屈突通等皆來援。玄感戰敗。遂釋洛陽。西圖關中。諸軍躡之。至弘農。連戰皆敗。與弟積善步走。謂積善曰。事敗矣。汝可殺我。積善殺之。因自刺不死。為追兵所執。與玄感首俱送行在所。磔其屍於東都市。三日復鬻而焚之。弟玄獎。玄縱。萬石等皆相繼就戮。餘黨悉平。密復聚兵為亂。稱魏公。

置官屬。後降唐。復叛被殺。

賀若弼

賀若弼。洛陽人。少驍勇。便弓馬。仕周為壽州刺史。封襄邑縣公。隋文帝受禪。陰有平陳之志。弼忻然以為已任。開皇九年。大舉伐陳。弼為行軍總管。齮破南徐州。執其刺史。進屯蔣山白土岡。敗陳兵。執其將蕭摩訶等。遂從北掖門入。而韓禽已先執陳叔寶。弼恚恨。與禽相詬。挺刃而出。令叔寶作降箋歸已。不果。而晉王廣以弼先期決戰。違軍令。下之吏。文帝驛召勞之。賜物八千段。加位上柱國。進封宋國公。轉右武侯大

將軍兄弟皆為郡公刺史列將。其家珍玩不可勝計。婢妾曳羅綺者數百人。弼自謂功名出朝臣之右。冀為宰相。而仍為將軍。意甚不平。形於言色。由是免官。弼怨望愈甚。久之。下獄。公卿奏弼怨望罪當死。弼曰。臣恃至尊威靈。將八千兵度江。禽陳叔寶。以此望活。上曰。此已格外酬賞。何用追論。然終惜其功。特令除名。歲餘復其爵位。弼意猶憤怨。又以罪下獄。上數之曰。人有性善行惡者。公之為惡。乃與行俱。有三大猛。嫉妬心太猛。自是非人心太猛。無上心太猛。昔在周時。已教他兒子反。此心終不改邪。帝謂侍臣曰。弼平

陳後便索內史。又索僕射。意圖鎮廣陵。又求荊州總管。並是作亂處。意終不改。煬帝大業三年。竟以謗議坐誅。

宇文述

宇文述字伯通。代郡武川人。少驍勇。便弓馬。仕周。積功。拜上柱國。封褒國公。隋開皇初。拜行軍總管。平陳。以功授子化。及為開府。晉王廣鎮揚州。甚善於述。奏為壽州總管。訪以奪宗之計。述謂廢立大事。能移主上者。唯揚素。移素志者。唯其弟約。乃為晉王多齎金寶入關。與約交歡。因託言於素。素從之。由是情好日

密命述子士及尚南陽公主。賞賜不可勝計。晉王為皇太子。以述為左衛率。煬帝立。封許國公。加開府儀同三司。給鼓吹一部。從帝西巡金山。還至江都宮。勅述與蘓威典選預朝政。而親愛過於威。頒賜相望於道。述善供奉。便僻側媚。又有巧思。數為竒服異物進奉。帝彌悅之。言無不從。勢傾朝廷。百寮莫敢違忤。性復貪鄙。富商大賈隴右諸胡。皆通賂遺。金寶山積。後庭曳羅綺者甚衆。家僮千餘人。皆控良馬。被服金玉。小人雲定興。趙行樞。皆進賂諂事述。驟得寵用。故太子勇諸子。述皆勸帝殺之。及征高麗。述奉密旨誘執

乙支文德。文德詣其營。述緩縱使歸。內不自安。復與諸將率兵追之。被其欺給。將士疲弊。九軍皆敗績。初度遼軍三十萬。五千入。及還唯二千七百。帝怒除其名。明年又征遼。復其官爵。楊玄感亂。議者多勸帝還京師。述請便道向洛陽。及至東都。又觀望帝意。勸幸江都。述遇疾死。其子化及。士及。智及。皆兇險無賴。恃恩放恣。貪冒尤甚。時李密等作亂。帝懼留淮左。不敢歸。從駕驍果多關中人。思歸謀欲叛。諸將司馬德戡。元武達。裴虔通等。日夜扇誘。推化及為主。虔通等以兵入宮。弒帝。迎化及為丞相。立秦王子浩為帝。擁衆

西歸。為李密等所敗。將士多叛。亡。兵勢日蹙。化及兄弟無計。唯事縱飲。自知必敗。於是鳩殺浩。僭稱帝於魏縣。改元。置百官。國號許。竇建德等敗之。禽化及。數其罪。并其弟子黨與皆斬之。

王世充

王世充。本西域胡人。祖支頽。徙居新豐。死。其妻少寡。與儀同主祭野合。生子瓊。世充父也。因姓王氏。世充。卷髮豺聲。沈猜多詭詐。好兵法。曉龜策。隋開皇中。為兵部員外郎。善敷奏。明習法律。而舞弄文墨。高下在心。或有駁難之者。世充利口飾非。辭義鋒起。眾知

其非而莫能屈。煬帝世遷江都丞。領江都宮監。時帝
數臨幸。世充善候顏色。阿諛順旨。彫飾池臺。陰奏遠
方珍物以媚帝。帝親昵之。大業八年。隋始亂。世充內
懷僥倖。卑身禮士。陰結豪俊。收衆心。有犯法者。多枉
法出之。楊玄感反。齊郡孟讓等盜起。世充擊之有功。
帝以為有將帥才略。始任領兵。矯偽自苦。以求聲譽。
突厥圍帝於鴈門。世充悉發江都人赴難。在軍中垢
面悲泣。晝夜不解甲。藉草而坐。帝聞以為愛已。益信
任之。遷江都通守。帝又幸江都。世充知帝好內。乃言
江淮良家多有美女。願備後庭。無由自進。帝益喜。命

世充選取。後令小船送東京。而道路賊阻。使者苦役。有沈溺之者。世充祕之。又遽簡閱以供進。李密逼東都。詔遣世充為將軍。與密戰。敗。喪士卒五萬人。止存千數。世充至河陽。自繫獄請罪。越王侗遣使赦之。召還都。收散卒。字文化。及殺煬帝於江都。世充等奉侗為主。侗以世充為吏部尚書。封鄭國公。又與其黨爭權。以兵圍宮。殺右司郎盧楚等。使韋節諷侗命拜己為尚書右僕射。總督內外諸軍事。授其兄暉為內史。入居禁中。後敗李密。得其衆。又使韋節諷侗拜己為太尉。署置官屬。以尚書省為其府。尋自稱鄭王。相國。

加九錫。備法物。自是不復朝。佗信道士詐說圖讖。羅
取雜鳥。書帛繫其頸。自言符命。遂廢佗。陰殺之。僭即
皇帝位。國號鄭。唐太宗帥師圍之。竇建德來救。并執
之歸長安。斬建德。世充亦被殺。

浙江圖

歷代臣鑒卷之三十二

歷代臣鑒卷之三十三

惡可為戒

唐

來俊臣

來俊臣。京兆人。父操。博徒也。里人蔡本負博數十萬。不能償。操因納其妻。已娠。遂生俊臣。天資殘忍。嘗為姦盜。捕送獄。獄中上變。刺史東平王續按訊無狀。杖之百。天授中。續以罪誅。俊臣自陳前。上琅琊王沖反狀。為續所抑。武后以為諒。累擢侍御史。按詔獄數。稱旨。后陰縱其慘。前後夷千餘族。拜左臺御史中丞。中

外累息。至以目語。俊臣乃引侯思止。王弘義。郭弘霸。李仁敬。康暉。衛遂忠等。陰嘯不逞百輩。使飛語誣。蟻公卿。上急變。每擿一事。千里同時輒發。契驗不差。時號為羅織牒。左署曰請付來。俊臣或侯思止推實。必得。后信之。詔於麗景門別置獄。勅來俊臣等。顛按事。百不一貸。弘義戲謂麗景門為例。竟謂入者例皆盡也。俊臣與其屬朱南山。萬國俊。作羅織經一篇。具為支脉綱由。咸有首末。按以從事。俊臣鞠囚。不問輕重。皆注醢于鼻。掘地為牢。或寢以匭溺。或絕其糧。囚至齧衣絮以食。大抵非死。終不得出。每赦令下。必先殺

重囚乃宣詔。又作大枷。各為號。曰定百脉。喘不得。突
地吼。著即臣。失魂膽。實同反。反是實。死猪愁。求即死。
求破家。後以鐵為冒頭。被枷者宛轉地上。少選而絕。
凡囚至。先布械于前。示囚莫不震懼。皆自誣服。如意
初。誣告大臣狄仁傑等六人下獄。俊臣乃奏囚降制。
一問而服者同。首法得減死。仁傑等已論死。待日而
決。仁傑乃遣子持帛書稱枉。后見愕然。遣通事舍人
周繼往視。遽假仁傑襟帶立西廂。繼懼俊臣。東視唯
唯。去莫敢聞。先是宰相樂思晦為俊臣夷其家。有子
九歲。上變。得召見。言俊臣凶慘罔上不道。若陛下假

條反狀付之。無大小皆如詔。臣父死。族夷不求生。但
惜陛下法為俊臣所弄耳。后意寤。由是仁傑六族皆
免。又按大將軍張虔勗。內侍范雲仙。虔勗訟枉於大
理。徐有功。俊臣使衛士亂斫之。雲仙自陳。命截其舌。
皆即死。人人脅息。久之。俊臣納賈人金。為御史所劾。
下獄當死。后忠其上。變得不誅。免為民。長壽中。還授
殿中丞。坐贓貶同州參軍事。暴縱自如。奪同僚妻。又
辱其母。俄召為合宮尉。擢洛陽令。進司僕少卿。吐蕃
酋有婢善歌舞。令其黨告以謀反。而求其婢。諸蕃長
割耳勞面訟寃。僅得解。慕連耀等有異謀。吉頊以白

俊臣殺數十族。既欲擅發姦功。即中瑱以法。瑱大懼。求見后。自直。乃免誣。司刑史樊戩以謀反誅。其子訴關下。有司無敢治。因自剗腹。秋。官侍郎劉如璿為流涕。俊臣奏與同惡。后為宥。死流漢州。始王慶詵女適段簡而美。俊臣矯詔強娶之。簡有妾美。俊臣遣人示風旨。簡懼。以妾歸之。初。俊臣屢拮摭諸武。太平公主。張昌宗等過咎。后不發。至是。諸武共證其罪。有詔斬於西市。年四十七。人皆相慶曰。今得背著床瞑矣。爭抉目摘肝醢其肉。湏臾盡。以馬踐其骨。家屬籍沒。方俊臣用事。託天官得選者二百餘。負及敗。有司自首。

后責之對曰。臣亂陛下法。身受戮。忤俊臣。覆臣家。后赦其罪。

周興

周興。萬年人。少習法律。自尚書史積遷。秋官侍郎。屢決制獄。文深峭。妄殺數千人。武后奪政。拜尚書左丞。上疏請去唐宗正屬籍。是時左史江融有美名。興指融與徐敬業同謀。斬于市。臨刑。請得召見。興不許。融叱曰。吾死無狀。不赦汝。遂斬之。尸奮而行。刑者蹴之。三仆三作。天授中。人告興與丘神勣謀反。詔俊臣鞫。狀興未知被告。方對。俊臣食。俊臣曰。囚多不服。柰何。

興曰。易耳。內之大甕。燒炭周之。何事不承。俊臣曰善。命取甕。且燒火。徐謂興曰。有詔按君。請嘗之。興駭汗。叩頭服罪。詔誅神勣。而宥興。流嶺表。在道為讎人所殺。

李林甫

李林甫。長平肅王叔良曾孫。初為千牛直長。開元初。遷太子中允。時武惠妃寵傾後宮。子壽王尤愛林甫。因中人白妃願護壽王為萬歲計。妃德之。裴光廷。夫人武三思女。嘗私林甫。而高力士本出三思家。光廷卒。武請力士以林甫代為相。力士未敢發。玄宗因肅

嵩言自用韓休。方具詔。武適語林甫。使為休請。休既相。德林甫而與嵩有隙。乃薦林甫有宰相才。妃陰助之。即拜黃門侍郎。尋為禮部尚書同中書門下三品。再進兵部尚書。皇太子鄂王光王被譖。玄宗欲廢之。張九齡切諫。帝不悅。林甫私語中人曰。天子家事。外人何與邪。帝在東都。欲還長安。裴耀卿等建言。農人墾圃未畢。須冬可還。林甫曰。二都本帝王東西宮。車駕往幸。何所待時。假令妨農。獨赦所過租賦可也。帝大悅。即駕而西。時九齡守正持重。而林甫特以便佞。得大任。每嫉九齡。陰害之。玄宗欲進朔方節度使牛仙

客實封。九齡謂當與公固爭。林甫然許。及進見。九齡極論。而林甫抑嘿。退又漏其言。仙客明日見帝。泣且辭。帝滋欲賞仙客。九齡持不可。林甫為人言。天子用人。何不可者。玄宗善林甫不專。由是益疏九齡。罷其政事。專任林甫。相仙客矣。公卿為戰栗。於是林甫進。兼中書令。帝卒用其言。殺三子。天下冤之。大理卿徐嶠。妄言大理獄殺氣盛。鳥雀不敢棲。今刑部斷死歲纔五十八。而鳥雀巢獄戶。幾至刑措。羣臣賀帝。而帝推功大臣。封林甫晉國公。仙客幽國公。及將立太子。林甫探上意。數稱道壽王。而玄宗屬意忠王。壽王不

得立。太子既定。林甫恨謀不行。且畏禍。乃陽善韋堅。堅。太子妃兄也。使任要職。將覆其家。以搖東宮。及搆堅獄。而太子絕妃自明。又以計覆太子杜良娣家。太子亦出良娣為庶人。未幾。又擿濟陽別駕魏林使誣河西節度使王忠嗣欲擁兵佐太子。帝不信。然忠嗣猶斥去。林甫數曰。太子宜知謀。帝曰。吾兒在內。安得與外人相聞。此妄耳。林甫數危太子。未得志。一日從容曰。古者立儲君。必先賢德。非有大勲力於社稷。則莫先元子。玄宗久之曰。慶王往年獵。為豹傷面。甚。答曰。破面不愈於破國乎。玄宗頗惑。曰。徐思之。然太子

自以謹孝聞。內外無基言。故飛語不得入。帝無所發。其猜。林甫善刺上意。時玄宗春秋高。聽斷稍怠。重接對大臣。及得林甫。任之不疑。林甫善養君欲。每奏請必先餉遺左右。審伺微旨。至饗養夫御婢皆所款厚。故天子動靜必具得之。性陰密。忍誅殺。不見喜怒。面柔令。初若可親。既崖阱深阻。卒不可得也。公卿不由之而進。必被罪徙。附麗者雖小人。且為引重。同時相若。九齡。李適之。皆遭逐。至楊慎矜。張瑄。盧幼臨。柳升等。緣坐數百人。並相繼誅。以王鉷。吉溫。羅希奭為爪牙。數興大獄。衣冠為累息。林甫有堂如偃月。號月堂。每

欲排搆大臣。即居之。思所以中傷者。若喜而出。即其家碎矣。子岫見權勢熏灼。惕然懼。常從游後園。見輦重者。跪涕曰。大人居位久。枳棘滿前。一旦禍至。欲比若人可得乎。林甫不樂。曰。勢已然。可柰何。時帝詔天下士有一藝者得詣闕就選。林甫恐士對詔或斥已。即建言士皆草茅。未知禁忌。徒以狂言亂聖聽。請悉委尚書省長官試問。使御史中丞監總。而無一中程者。林甫因賀上。以為野無留才。咸寧太守趙奉璋得林甫隱惡二十條。將言之。林甫諷御史捕繫奉璋。劾妖言抵死。故事宰相不務權威。出入騎從簡寡。士庶

不甚引避。林甫自見結怨者衆。憂刺客竊發。其出入廣駟騎。先驅百步。傳呼呵衛。金吾為清道。公卿辟易趨走。所居重關。復鑿絡版甃石。一夕再徙。家人亦莫知也。或帝不朝。群司要官悉走其門。臺省為空。林甫無學術。發言鄙陋。聞者竊笑。用人非諂附者。一以格令持之。人憚其威權。始厚王鉷。為盡力。及鉷敗。詔宰相治狀。林甫大懼。不敢面鉷。獄具署名。亦無所申救。因以楊國忠代為御史大夫。林甫薄國忠。以貴妃故善之。及是權益盛。始交惡。若仇敵。國忠方兼劔南節度使。而南蠻入寇。林甫因建遣之鎮。欲離間之。補關

杜璿再上書言政事。片為下邳令。因以語動其餘曰。明主在上。羣臣將順不暇。亦何所論。君等獨不見立仗馬乎。終日無聲。飫三品芻豆。一鳴則黜之矣。後雖欲不鳴得乎。由是諫爭路絕。林甫疾儒臣以方略積邊勞且大任。欲杜其本。以久已權。即說玄宗曰。文吏為將。憚矢石。不身先。不如用蕃將。夷狄不足圖也。玄宗然之。因以安思順代林甫領節度。而擢安祿山。高仙芝。哥舒翰等專為大將。林甫利其虜無入相之資。故祿山得專三道勁兵處。十四年不徙。卒蕩覆天下。及林甫卒。祿山暴其短。使阿布思降將入朝告林甫。

與思約為父子有異謀。事下有司。其壻楊齊宣懼。言
林甫馱祝帝。國忠劾其姦。玄宗怒。詔林甫淫祀馱勝。
結叛虜。圖危宗社。悉奪官爵。斲棺剔取。含珠金紫。更
以小樁。用庶人禮葬之。諸子寧。嶼。岫等。悉徙嶺南黔
中。籍其家。

安祿山

安祿山。營州柳城胡也。通六蕃語。為互市郎。張守珪
節度幽州。守珪養為子。後以平盧兵馬使擢特進幽
州節度副使。御史中丞張利貞言祿山能。乃授營州
都督平盧軍使。順化州刺史。積官至驃騎大將軍。范

陽節度河北採訪使仍領平盧軍。時宰相李林甫嫌
儒臣以戰功進。請顯用蕃將。故玄宗寵祿山益牢。祿
山陽為愚不敏。蓋其姦承間。奏曰。臣生蕃戎。寵榮過
甚。無異材可用。願以身為陛下死。天子以為誠。憐之。
令見太子。不拜。左右摘語之。祿山曰。臣不識皇太子
何官。帝曰。吾百歲後付以位。謝曰。臣愚知陛下不知
太子。祿山有亂。天下意令劉駱谷居京師。伺朝廷隙。
進御史大夫。為起第京師。以中人督役。服御雖乘輿
不能過。帝登勤政樓。幄坐之。太子諫曰。自古幄坐。非
人臣當得。陛下寵祿山過甚。必驕。祿山逆謀日盛。見

天子開邊。乃給契丹諸酋大置酒毒焉。既酣。悉斬其
首先後殺數千人。獻馘闕下。帝不知。賜鐵券。封柳城
郡公。進東平郡王。九載。兼河北道採訪處置使。求兼
河東。遂拜雲中太守。河東節度使。既兼制三道。意益
侈。帝以其子慶宗為太僕卿。慶緒鴻臚卿。慶長祕書
監。十一載。率河東兵討契丹。不得志。詔阿布思以師
會。祿山忌其才。不相下。欲罷取之。表請自助。布思懼
而叛。奔葛邏祿。葛邏祿懼。執布思獻之京師。祿山得
布思之衆。兵雄天下。愈偃肆。皇太子及宰相屢言祿
山反。帝不信。時楊國忠疑隙已深。建言追還朝以驗

厥狀。祿山乃馳入謁。玄宗意遂安。十三載來謁華清宮。對帝泣曰。臣蕃人。陛下擢以不次。國忠必欲殺臣以甘心。帝慰解之。拜尚書左僕射。詔還鎮。又請為閑廐隴右羣牧等使。表吉溫自副。其軍中有功位將軍者五百人。中郎將二千人。祿山之還。玄宗斥御服賜之。祿山大驚不自安。疾驅去。至淇門。既總閑牧。因擇良馬內范陽。又奪張文儼馬牧。反狀明白。人告言者。帝必縛與之。祿山懼朝廷圖己。每使者至。稱疾不出。嚴衛然後見。帝賜慶宗娶宗室女。詔祿山觀禮。辭疾甚。獻馬三千匹。騶豹自倍。車三百乘。乘三士。因欲罷

京師。帝賜書曰。十月朕待卿華清宮。使至。祿山踞床曰。天子安穩否。使還言曰。臣幾死。冬十一月。反范陽。詭言奉密詔討楊國忠。凡七日。反書聞。帝方在華清宮。中外失色。車駕還京師。斬慶宗。賜其妻康死。下詔切責祿山。許自歸。祿山答書慢甚。乃大募兵。以封常清為范陽平盧節度使。郭子儀為朔方節度。關內支度副大使。右羽林大將軍。王承業為大原尹。衛尉卿張介然為汴州刺史。金吾將軍程千里為潞州長史。以榮王為元帥。高仙芝副之。馳驛討賊。常山太守顏杲卿殺賊將李欽湊。禽高邈。何千年。於是趙郡鉅鹿廣

乎清河。河間。景城。六郡皆為國守。祿山所有。纔盧龍。密雲。漁陽。汲。鄴。陳留。滎陽。陝郡。臨汝而已。賊據東京。銳情僭號。故兵久不西。而諸道兵得稍集。旬日衆數萬。明年正月。僭稱雄武皇帝。國號燕。建元聖武。郭子儀自雲中引兵與光弼合。敗史思明於九門。思明奔趙郡。思明與光弼戰。敗於嘉山。光弼收郡十三。河南諸郡皆嚴兵守。潼關不開。崔乾祐等攻破之。祿山至長安。肆為殘虐。人益不附。腹心雅故皆為仇敵。郡縣相與殺守。將迎王師。肅宗治兵靈武。豪傑殺賊吏自歸者無虛日。祿山既叛。不能無恚懼。至是目盲。俄又

得疽疾。尤卞躁。左右給侍無罪輒死。李猪兒與嚴莊二人深怨之。至德二載二月朔。祿山朝羣臣。創甚罷。是夜嚴莊慶緒持兵扈門。猪兒入帳下。以大刀斫其腹。祿山盲。捫佩刀不得。振幄柱呼曰。是家賊。俄而腸潰于床。即死。年五十餘。包以氈罽埋床下。偽詔立慶緒為皇太子。又矯稱傳位慶緒。乾元元年秋九月。帝詔郭子儀討慶緒。慶緒走。獲其弟慶和。斬于京師。慶緒求救於史思明。思明有衆十三萬。三分其軍趨鄴。慶緒急。乃奉皇帝璽綬讓思明。慶緒謀拒思明。思明請慶緒歃血盟。不得已。以五百騎詣思明。慶緒至。再

拜謝曰。臣不克負荷。棄兩都。不意大王暴師遠來。唯
王圖之。思明恚曰。為人子殺父求位。非大逆邪。顧左
右牽出斬之。祿山父子僭位凡三年而滅。

歷代臣鑑卷之三十三



浙江圖書館



浙江圖書館

浙江圖書館

浙江圖書館善本










甲 登記號：012849

一九 年 月 日

浙江圖書館

colorchecker CLASSIC

x-rite



浙江圖書館

